



Schweizerische Eidgenossenschaft  
Confédération suisse  
Confederazione Svizzera  
Confederaziun svizra

Departament federal d'affars exteriurs DFAE

**Pled dal  
cusseglier federal Ignazio Cassis  
schef dal Departament federal d'affars exteriurs DFAE**

**cun il titel  
Sport – dapli che mo la pli bella chaussa  
secundara dal mund**

**tegnì a chaschun da  
dar il bainvegni a las atletas ed als atlets  
olimpics e paralimpics**

**Berna, ils 4 d'avrigl 2022  
Valair vala il pled discurrì.**

Stimada dunna cusseglieria federala, chara Viola

Stimadas atletas e preziads atlets

Stimadas assistentas e preziads assistents

Chars ospes

Il sport è en temps «normals» la pli bella chaussa secundara dal mund. Ma sco Vus tuttas e tuts savais, n'èn ils temps da preschent betg «normals». Ni per Vus sco sportistas e sportists ni per nus tuttas e tuts. Ni durant ils ultims dus onns da la pandemia, ni ussa. Per l'emprima giada suenter bunamain 80 onns ha lieu en l'Europa ina guerra offensiva. Ina realitat trista e tragica. Dastgain nus anc ans legrar da medaglias en questa situaziun? Quant fitg dastgain nus animar cumbats da concurrenza entant che autras persunas ston temair per lur vita?

## 1. Success svizzer grazia a la diversitat vivida

Avant duas emnas sun jau stà en la Pologna ed en la Moldavia, al cunfin cun l'Ucraina. Là hai jau scuntrà famiglias. Mammas ed uffants tschertgan proteczion a l'exterior. Milliuns umans èn en fugia. Jau als hai tadlà ed hai discurri cun els: lur raquints na laschan nagin indifferent – er betg mai! Jau hai però er sentì, quant gronda che lur amur per la patria è. Lur superbia, lur colliaziun. Emoziuns ch'i dat er en il sport. Uschia sun jau er fitg gugent qua cun Vus oz, stimadas dunnas e preziads signurs. Perquai ch'il sport collia. El ans mussa la coesiun entaifer la squadra. Ed il sport ans renda superbias e superbis da noss pajais. Quai vala en la pasch – e tant pli fitg en la guerra.

Il sport è nossa identitat collectiva, en spezial en in pajais sco il noss, cun tut sia diversitat: pliras linguas e religiuns, diversas culturas e differents tips d'umor. Qua n'emporti betg che la skiunza a la partenza s'exprima en talian, ch'il skip da la squadra da curling giubilescha en franzos, ch'il snowboardist discurra rumantsch u che la trenadra da la squadra da hockey baterla tudestg svizzer. Nus essan ina suletta squadra, nus essan in sulet pajais: la Svizra. Questa diversitat è fitg impurtanta per mai sco president da la Confederaziun e sco represchentant da la cuminanza linguistica italofona. Jau sun intgantà che la Svizra ha gudagnà sedesch medaglias als Gieus olimpics e paralimpics. Ed jau sun anc pli content, che questas medaglias èn vegnidas recaltgadas d'atletas e d'atlets da tut las regiuns da noss pajais.

## 2. Engaschament sur ils cunfins

Il sport rinforza er il barat internaziunal. Als Gieus olimpics e paralimpics essas Vus adversarias ed adversaris, ma Vus trenais ensem; Vus avais la medema finamira. Il sport permetta da parter emozions. Il sport ans mussa d'observar las reglas e da respectar las valurs. Ins na po betg adina gudagnar. Ni en il sport ni en la vita. La vaira valur d'in sportist n'èn betg las medaglias ch'el porta enturn il culiez, mabain ses engaschament exemplaric per la chaussa, sia lavur da preparaziun lunga e dira, sia modestidad en il success e sia bainvulentscha en la sconfitta. Quai èn las valurs ch'il sport transmetta.

## 3. Sport sco speranza en temps difficils

Charas atletas e chars atlets, mintgina e mintgin da Vus ha mes pli grond respect. Mia stima va er a tut quellas e quels che han manchentà la medaglia, che han però tuttina

gì la forza da star si puspè e da cuntinuar. Quai è resilienza! Sche Vus stais si puspè, ans mussais Vus che capitulo n'è nagina opziun. Vus ans mussais, ch'i vala la paina da cumbatter per nossas finamiras. Vus ans dais speranza. Quai è la vaira lecziu per la vita. La medema lecziu che las fugitivas ed ils fugitivs da la guerra ans dattan: els auzan il chau e cumbattan per lur pajais, per lur atgnas valurs.

Vus tuttas e tuts, charas atletas e chars atlets, essas ina inspiraziun, perquai ch'il sport è dapli che mo in passatemp. Il sport è lavur, ambiziun e blera umanitat. E quai è precis quai che nus duvrain; oravant tut en quests temps «betg normals».

Charas sportistas e chars sportists, en num da la Svizra engraziel jau cordialmain a Vus tuttas e tuts. Nus avain dastgà perseguitar cun tensiun, festivar e mintgatant er patir ensemens cun Vus. Vus rinforzais la coesiun da noss pajais, Vus unis la Svizra – gist en temps turbulents. Jau sun superbi da Vus! Cordial engraziament!